

望主福我於天上兮。有發利塞俄之人。見贊美齊聲。欲止不能禁。乃向耶穌曰。吾師宜禁諸弟子。耶穌曰。縱使能禁人聲。石亦未免發聲也。發利塞俄輩私相謂曰。今柰之何。且遍天下而從彼矣。耶穌行近城郭。遂指而揮淚。慨嘆城中衆迷曰。嗚呼。爾有所障隔哉。而不能識此太平日。將必有敵兵之圍。爾子孫離折。城之石無聯合者。災害非常。繇汝不識。臨爾拯爾者。致然也。厥後此城。果被焦滅矣。

再淨都城聖殿

第十

耶穌既入都城。闔城人士咸震動。致問焉。從者謂曰。是乃耶穌。玻羅弗大聖者也。耶穌入聖殿。見貿易禽獸錢貨者。錯雜其間。麾之去。復禁携雜物往來者。謂衆曰。爾不知經中言乎。聖堂乃祈禱之所。豈可以此爲盜藪耶。

都城聖跡

第十一

掌教及學士諸人。日夜圖害耶穌。顧多人恪奉。計無所施。此時復有盲者跛者。咸詣耶穌前。一一爲起其疾。童穉亦歡呼曰。賀三納達未之子。二黨人